

1

GIPUZKOAKO LURRALDE HISTORIKOKO XEDAPEN OROKORRAK

GIPUZKOAKO FORU ALDUNDIA

OGASUN ETA FINANTZA DEPARTAMENTUA

11/2020 Foru Dekretua, urriaren 6koa, interes orokorreko xedeen esparruan lehentasunezko mezenasgo jarduerak 2020. urterako ezartzen dituen.

Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, mezenasgoari aplikagarri zaizkion zerga pizgarriak arautzen ditu III. tituluan.

Zehazki, titulu horretako IV. kapituluak jasotzen du zein zerga onura aplikatzen zaizkien lehentasuna aitortua duten jardueri eta aparteko interes publikoa duten gertakarietan laguntzeko programei.

Lehentasunezko mezenasgo jardueri dagokienez, aipatutako foru arauaren 29. artikulua dio Gipuzkoako Foru Aldundiak interes orokorreko xedeen esparruan lehentasunezkoztat jotzen diren mezenasgo jardueren zerrenda bat egin ahal izango duela ekitaldi bakoitzerako, entitate onuradunak zein diren eta jarduera horiek zer beharkizun eta baldintza bete behar dituzten ere zehaztuta: hori guztia artikulua horretan aurreikusita dauden zerga onurak aplikatze aldera.

Foru dekretu honen bitartez ezartzen dira 2020. urterako lehentasunezkoztat jotzen diren jarduerak, eta, halaber, zehazten da zer entitatek izan behar duten ekarpenen onuradunak, hala dagokienean, eta zer beharkizun eta baldintza bete behar diren jarduera horien garapenean.

Aurreko ekitaldiko era berean, foru dekretu honek informazio obligazioak ezartzen ditu bai lehentasunezko jarduerak eta programak garatzeko ekarpenak jasotzen dituzten pertsona eta entitateentzat, eta bai jarduketa esparru desberdinetako organo eskudunentzat, eta horren helburua da informazio horretatik ateratzen diren ondorioak euskarri bat izatea emakume eta gizonen arteko aukera berdintasuna sustatuko dituzten lehentasunezko jarduerak etorkizunean deklaratzeko.

Beharrezkoa da nabarmentzea Gipuzkoako Lurralde Historikoan kultur mezenasgoaren aldeko zerga pizgarriak arautzen dituen otsailaren 11ko 2/2019 Foru Araua onartzearekin batera kultur arloan beste mezenasgo esparru berezi bat zabaltzen dela. Esparru horretan, berariazko pizgarriak ezartzen dira, betiere kultur mezenasgoaren onuradun diren entitate jakin batzuek garatutako kultur jarduerak edo proiektuak egitean edo Gipuzkoako Foru Aldundiak gizarte onurakotzat hartutako jarduerak edo proiektuak gauzatzean izaten den partaidetza pribaturako.

2/2019 Foru Arauak 18. artikuluan jasotakoaren arabera, bertan araututako onura fiskalak bateraezinak dira, zenbateko berberetarako, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzko apirilaren 7ko 3/2004 Foru Arauak jasotzen dituen onura fiskalekin.

Horiek horrela, Ogasun eta Finantza Departamentuko foru diputatuak proposaturik, Lege Aholkularitzako Batzordearekin bat etorriz, eta Diputatuen Kontseiluak gaurko bileran eztabaidatu eta onartu ondoren, honako hau

XEDATZEN DUT

1. artikulua. Xedea.

Foru dekretu honen helburua da interes orokorreko 2020. urterako xedeen esparruan lehentasunezkoztat jotzen diren mezenasgo jarduerak ezartzea; eta, orobat, adieraztea zer entitate izango diren onuradunak eta zer beharkizun eta baldintza bete behar dituzten jarduera horiek apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, 29. artikuluan xedatutakoaren ondorioetarako.

2. artikulua. Lehentasunezko jarduerak gizarte politiken esparruan.

1. Gizarte politiken esparruan lehentasunezko jarduerak 2020. urtean Gipuzkoako Lurralde Historikoan hasi diren edo hasiko diren proiektuak, helburu hauetara bideratutakoak:

- a) Desgaitasuna duten edo bazterketa arriskuan dauden pertsonen lan eta gizarte arloan gizarteratzea.
- b) Mendekotasun egoeran dauden pertsonen, desgaitasuna dutenei eta gizarte bazterketa egoeran edo babesgabezia egoeran dauden pertsonen zuzendutako zainketen eta laguntzen formula berriak ezartzea.
- c) Komunitatearen erantzukizuna gizarte arloko behar berriei erantzun ahal izateko.
- d) Ikerkuntza eta berrikuntza gizarte zerbitzuen arloko eta arlo sozio-sanitarioko gaien inguruan.

2. Aurreko apartatuan adierazitako jarduera eta programei dagokienez, foru dekretu honetako 13. artikuluan aipatutako memoriarekin batera, aipatu beharko da jarduerak edo programak zer kolektiborentzat dauden pentsatuta eta zer helburu lortu nahi den.

3. artikulua. Kirolaren esparruko lehentasunezko jarduerak.

2020. urterako honako programa edo jarduera hauek izango dira lehentasunezkoak kirolaren esparruan:

a) Gipuzkoako Foru Aldundiak 2019-2020 eta 2020-2021 ikasturteetarako onartzen dituen eskola kiroleko jarduera programetan ezarritako beharkizunak eta baldintzak betetzen dituzten kirol jarduerak.

b) Gipuzkoako kirol elkarte, selekzio eta kirolariek kirol txapelketetan parte hartzea, betiere beharkizun hauek betetzen badira:

a') Errendimenduko kirol txapelketa ofiziala izatea eta izaera profesionalik ez edukitzea.

b') Parte hartzea estatuko bi kategoria gorenetakoa batean, Europa edo mundu mailako txapelketa batean, edo nazioarteko kirol topaketetan. Taldekako zenbait kirol modalitateetan, hirugarren kategoria aintzat hartu ahal izango da lehiaketaren lurralde eremua autonomia erkidegoaz gaindikoa denean.

Mendiko kirol modalitatean, lehentasunezkoak izango dira zortzi mila metrotik gorako gailurrak igotzea eta goi mailako eskaladak egitea.

Bertako kirol modalitateak direnean –tosta finkoko arraunketa, pilota, boloak eta toka eta herri kirolak–, lehiaketaren lurralde eremua kasuan kasuko ezaugarrien arabera erabakiko da.

c) Honako baldintza hauek betetzen dituzten kirol jarduerak:

a') Nazioarteko parte hartze esanguratsua izatea, bai kualitatiboki bai kuantitatiboki. Baldintza hori ez da kontuan hartuko bertako kirol modalitateak direnean edo jardueren helburu nagusia kirol errekreazioa denean, baldin eta, azkeneko kasu horretan, mila kirolarik baino gehiagok parte hartzen badute.

b') Jarduerak, zati batean behintzat, Gipuzkoan egitea.

d) Protagonistak emakumeak diren edo emakumeen partaidetza bultzatzen duten kirol jarduera edo lehiaketak, edozein dela ere modalitatea, berariaz, genero estereotipoak haustea bultzatzen dutenak, edota emakumeen ikusgarritasuna eta aitorpen soziala sustatzen dutenak.

e) Desgaitasuna duten pertsonen zuzenduta dauden kirol egokituko edota kirol inklusiboko programak, betiere Gipuzkoan gauzatzen badira.

4. artikulua. Lehentasunezko jarduerak kulturaren esparruan.

Kulturaren esparruan, 2020rako lehentasunezkoztat hartzen da nazioarteko kultur proiektuen prestaketa. Halakotzat hartuko dira nazioarte mailako aitortza lortu duten sortzaile lokalen obrak ezagutarazteko egiten direnak, espainiar estatutik kanpo jarduten duten kultur erakundeek egiten dituztenak edo hainbat herrialdetako artistek parte hartuta antolatzen direnak.

Inola ere lehentasunezko jarduera edo programaren deklarazioa ez da bateragarria izango gizarte onurakoak direla eta kultur mezenasgoa merezi dutela irizten zaien proiektu edo jarduerekin, Gipuzkoako Lurralde Historikoan kultur mezenasgoaren aldeko zerga pizgarriak arautzen dituen otsailaren 11ko 2/2019 Foru Arauak jasotakoaren arabera. Azken kasu horretan, aipatutako foru arauan jasotakoa izango da

aplikagarri.

5. artikulua. Euskararen esparruko lehentasunezko jarduerak.

1. 2020. urterako, honako jarduerak izango dira lehentasunezkoak euskararen esparruan:

- a) Euskararen erabilera soziala sustatzeko programa eta jarduerak.
- b) Informazioaren eta komunikazioaren teknologiak erabiliaz, edukiak euskaraz hedatzeko proiektuak.
- c) Herri edo eskualde mailako euskarazko hedabideak.
- d) Euskararen erabilera arlo sozioekonomikoan sustatzeko jarduerak eta ekintzak.
- e) Euskarazko ahozko ondarea babestu, suspertu eta hedatzeko jarduerak.

2. Aurreko apartatuan adierazitako jarduera edo proiektuetako bat zein batzuk egiten dituzten guztiak izan daitezke entitate onuradunak, baldin eta Gipuzkoako Foru Aldundiko Hizkuntza Berdintasuneko Zuzendaritza Nagusiak 2020an kudeatutako programen konturako dirulaguntzak jasotzeko beharkizunak betetzen badituzte.

6. artikulua. Lehentasunezko jarduerak sustapen ekonomikoaren eta berrikuntzaren esparruan.

1. Sustapen ekonomikoaren eta berrikuntzaren esparruan, 2020. urterako lehentasunezko zat hartzen dira ikerketa eta esperimendazio lana garatzen edo ahalbidetzen duten jarduerak: nanozientziak, nanoteknologiak, mikroteknologiak, fabrikazio aurreratuko ikerketa jarduerak, genomika eta proteomika, bioteknologia, neurozientziak, arlo biosanitarioa, energia berriagarriak eta erregai-pila, zibersegurtasuna, pertsonen zahartzea, elektromugikortasuna eta gastronomiaren digitalizazioa.

2. Aurreko apartatuan aipatu diren jardueraren bat edo batzuk beren helburuen artean dituzten entitate guztiak izan daitezke onuradunak. Nahitaezkoa da jarduera horiek Gipuzkoan egitea, eta entitateak lurralde horretan kokatuta egotea.

Zehazki, entitateek Zientzia, Teknologia eta Berrikuntzarako Euskal Sareko agenteak izan behar dute. Ospitaleek egindako ikerkuntza jarduerak ere barruan sartu daitezke, haien helburua 1. apartatuan jasotakoan artean badago.

Esparru honen barruan sartuko dira ikerkuntza lerro eta proiektuak, eta azpiegitura eta ekipamendu berrietan egindako inbertsioak.

7. artikulua. Lehentasunezko jarduerak suteen aurkako esparruan.

Suteen aurkako esparruan, 2020. urterako lehentasunezko zat hartzen dira Gipuzkoako Lurralde Historikoan suteen aurkako lanaren arloan trebatzea eta prestatzea xede duten irabazi asmorik gabeko entitate pribatuek garatutako jarduerak eta programak.

8. artikulua. Doako zerbitzu prestazioei onurarik ez aplikatzea.

Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, 29. artikuluan ezartzen dituen zerga onurak ez dira aplikagarriak izango pertsona fisikoen errentaren gaineko zergaren zergadunek, sozietateen gaineko zergaren zergadunek edo ez-egoiliarren errentaren gaineko zergaren zergadunek aurreko 2.etik 8.era bitarteko artikuluetan adierazitako esparruetako edozeinetan doan egin dituzten zerbitzu prestazioetan.

9. artikulua. Diruzkoak ez diren ondasun entregen balioaren zehaztapena.

Lehentasunezko hartutako jarduerak edo programak garatzeko diruz egiten ez diren ondasunen entregak baloratze aldera, jarraituko zaio apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga-pizgarriei buruzkoak, 20. artikuluan jasotakoari.

10. artikulua. Zerga onurak aplikatzeko mugak.

Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga-pizgarriei buruzkoak, 29. artikuluan jasotako zerga onurak bakarrik aplikatu ahal izango zaizkie batera hartuta dena delako programa edo jarduera garatu edo exekutatze behar diren inbertsioen eta gastuen batura gainditzen ez duten ekarpenei.

Muga hori gaindituz gero, zerga onura ekarpen zaharrenei aplikatuko zaie.

11. artikulua. Lehentasunezko jarduera izendatzeko eskaera.

1. Foru dekretu honetako 2.etik 7.era bitarteko artikuluetan aipatutako jarduera edo programetako bat edo batzuk egiten dituzten pertsona edo entitateek, 2020ko abenduaren 1a aurretik, idatziz eskatu behar dute delako jarduera lehentasunezkoen artean sartzeko, espresuki hala izenda dadin. Jarduketa esparruaren arabera Gipuzkoako Foru Aldundian eskudun den departamentuari aurkeztuko zaio eskaera hori.

2. Eskaera horrekin batera, lehentasunezko izaera eskatzen zaion jarduera edo programaren deskribapenari buruzko memoria bat aurkeztu beharko da, bai eta inbertsio, gastu eta sarreren aurrekontu bat.

12. artikulua. Lehentasunezko jardueratzat hartzeko elkarrekikotasuna.

Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, 31. artikuluan xedatzen duenez, foru arau horren 29. artikuluan aurreikusten diren zerga onurak estatuko eta beste foru lurraldeetako organo eskudunek lehentasunezko hartutako jarduerari eta programei ere aplikatuko zaizkie, baldin eta, haiek onartua duten araudian beste hainbeste egiten bada Gipuzkoako Foru Aldundiak onartutako jarduera eta programekin.

13. artikulua. Jarduera edo programen genero eraginari buruzko informazioa.

2020. urtean lehentasunezkotzat hartu eta garatutako jarduera eta programa guztietan, horiek garatzeko ekarpenak jasotzen dituzten pertsonak eta entitateek honako informazio hau sartu beharko dute irabazi asmorik gabeko entitateen zerga erregimena eta mezenasgoaren aldeko zerga pizgarriak aplikatzeko Erregelamendua onartzen duen azaroaren 2ko 87/2004 Foru Dekretuak 8. artikulua 1. apartatua aipatutako memorian: genero eraginari buruzko informazioa, jarduerak edo programak genero estereotipoak desagertzeko helburuak bete izanari buruzko informazioa eta, azkenik, emakume eta gizonen arteko aukera berdintasunaren sustapenari buruzko informazioa.

XEDAPEN GEHIGARRIAK

Lehena. Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, 29. artikulua 4. apartatua eta, orobat, azaroaren 2ko 87/2004 Foru Dekretuak, irabazi asmorik gabeko entitateen zerga erregimena eta mezenasgoaren aldeko zerga pizgarriak aplikatzeko Erregelamendua onartzen duenak, 8. artikulua aipatzen dituzten ziurtagiriak jaso beharko du Ogasun eta Finantza Departamentuan onura fiskala aplikatzen zaion zergaren aitorpena jasotzen duen Kudeaketa organoaren bisatua.

Bigarrena. Ez da beharrezkoa izango ziurtagiria bisatzea, baldin eta lehen aipatutako 29.4 artikulua arabera gaian eskumena duen departamentuak Ogasun eta Finantza Departamentuari zerrendaturik bidaltzen badio zer jarduera jotzen diren lehentasunezkotzat ekitaldi bakoitzerako, zeintzuk diren ekarpen egileak eta baldintzak betetzen dituzten jardueretarako zer kopuru eman diren.

Hirugarrena. Lehentasunezko izendatutako jarduera edo programak garatzen dituzten pertsona eta entitateek beren memorietan eman behar duten informazioan oinarrituta, gaian eskumena duen departamentuak txosten bat egingo du garatutako jarduera edo programaren genero eraginari buruz, eta, hala badagokio, txostenean hizpide izango du, baita ere, zer neurritan betetzen dituen jarduera edo programa horrek genero estereotipoak ezabatzeko eta emakume eta gizonen arteko aukera berdintasuna sustatzeko helburuak. Horretarako, Gipuzkoako Foru Aldundiko Emakumeen eta Gizonen Berdintasunerako Organoaren aholkularitza jasoko du.

AMAIERAKO XEDAPEN BAKARRA

Foru dekretu hau Gipuzkoako ALDIZKARI OFIZIALEAN argitaratu eta biharamunean jarriko da indarrean eta 2020ko urtarrilaren 1etik aurrera sortzen ditu ondorioak.

Donostia, 2020ko urriaren 6a.

DIPUTATU NAGUSIA,
Markel Olano Arrese.

OGASUN ETA FINANTZA
DEPARTAMENTUKO
FORU DIPUTATUA,
Jabier Larrañaga Garmendia. (5113)